

Ո Ր Ո Շ ՈՒ Մ թիվ- 146
վարչական տույժ նշանակելու մասին

«25» ապրիլի 2022թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով «ՊՐՈՍՏԵԽՆԻԿԱ» ՍՊԸ-ի տնօրեն Սերգեյ Պյոտրի Պոլովինկիի վերաբերյալ նյութերը.

Պ Ա Ր Զ Ե Ց Ի՝

ՀՀ ՊԵԿ հետբացթողումային հսկողության վարչության աշխատակիցները, ղեկավարվելով Եվրասիական տնտեսական միության մաքսային օրենսգրքի 333-րդ և «Մաքսային կարգավորման մասին» ՀՀ օրենքի 133-րդ հոդվածներով, իրականացրել են արտագնա մաքսային ստուգում «ՊՐՈՍՏԵԽՆԻԿԱ» ՍՊ ընկերությունում և հայտնաբերել, որ «ՊՐՈՍՏԵԽՆԻԿԱ» ՍՊ ընկերության անվամբ թիվ 05100011/131219/0038643 և թիվ 05100011/271219/0040565 ապրանքների հայտարարագրով ՀՀ ներմուծված ապրանքները հայտարարագրվել են ապրանքի նկարագրի վերաբերյալ ոչ ճշգրիտ տեղեկություններով:

ՀՀ ՊԵԿ մաքսային հսկողության վարչության 28.02.2022թ. «Ապրանքի ոչ ճիշտ դասակարգում հայտնաբերելու դեպքում ապրանքի դասակարգման վերաբերյալ» թիվ ԱԴՈ-22-000019 որոշումով հաստատվել է, որ վերը նշված հայտարարագրով հայտարարագրված «բեռնատար ավտոմեքենայի բենզինային շարժիչի ներքին այրման մաս» նկարագրությամբ ապրանքի փոխարեն ենթակա են հայտարարագրման «դիզելային շարժիչի համար նախատեսված մասեր» նկարագրությամբ ապրանք:

ՀՀ ՊԵԿ հետբացթողումային հսկողության վարչության կողմից 10.03.2022թ. կազմվել է թիվ 0002-Ա արտագնա մաքսային ստուգման ակտը, որը կից նյութերով՝ 17.03.2022թ. թիվ Ն/9-4/45467-2022 գրությամբ ուղարկվել է ՀՀ ՊԵԿ իրավաբանական վարչություն:

Նյութերի ուսումնասիրությունից պարզվել է, որ ապրանքի նկարագրի վերաբերյալ ոչ ճշգրիտ տեղեկությունները տրամադրել է «ՊՐՈՍՏԵԽՆԻԿԱ» ՍՊԸ-ի տնօրեն Սերգեյ Պյոտրի Պոլովինկին: 2022 թվականի մարտի 28-ին ՀՀ ՊԵԿ իրավաբանական վարչությունում Սերգեյ Պյոտրի Պոլովինկիի նկատմամբ ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության հատկանիշներով կազմվել է մաքսային կանոնների խախտման վերաբերյալ արձանագրություն, որի մեկ օրինակն ուղարկվել է վերջինիս:

Վարչական վարույթի ընթացքում «ՊՐՈՍՏԵԽՆԻԿԱ» ՍՊԸ-ի տնօրեն Սերգեյ Պյոտրի Պոլովինկին բացատրություն է տվել այն մասին, որ ընդունել է իր կողմից կատարված իրավախախտումը, միաժամանակ հայտնել է, որ սխալ տեղեկություններով հայտարարագրումը տեղի է ունեցել սխալմամբ:

ԵԱՏՄ մաքսային օրենսգրքի (այսուհետ՝ Օրենսգիրք) 2-րդ հոդվածի 32-րդ կետի համաձայն՝ «մաքսային հայտարարագիրը» մաքսային փաստաթուղթ է, որը պարունակում է տեղեկություններ ապրանքների վերաբերյալ կամ ապրանքների բացթողման համար անհրաժեշտ այլ տեղեկություններ, իսկ 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ: 35-րդ կետի համաձայն՝ մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտագրումն է:

Օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ

մաքսային ներկայացուցչի կողմից, եթե սույն օրենսգրքով այլ բան սահմանված չէ: ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր: ԵԱՏՄ մաքսային օրենսգրքի 106-րդ հոդվածով սահմանվում են ապրանքների հայտարարագրերում նշման ենթակա տեղեկությունները: 106-րդ հոդվածի 1-ին մասի 4-րդ կետի համաձայն՝ հայտարարագրում նշվում են տեղեկություններ ապրանքների մասին, որոնց մեջ ի թիվս այլոց նշվում է անվանումը, նկարագրությունը, որն անհրաժեշտ է այն մաքսային վճարների, հատուկ, հակազնազցման, փոխհատուցման տուրքերի և այլ վճարների հաշվարկման և գանձման համար, ապրանքների ծածկագիրը՝ Արտաքին տնտեսական գործունեության ապրանքային անվանացանկին համապատասխան:

Օրենսգրքի 84-րդ հոդվածի 3-րդ կետի համաձայն՝ հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու համար:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է մաքսային վճարների պակաս հաշվարկում կամ չհաշվարկում, առաջացնում է տուգանք՝ այդ մաքսային վճարների 50 տոկոսի չափով:

Սերգեյ Պյոտրի Պոլովինկին 2022 թվականի ապրիլի 25-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Այսպիսով, գործի նյութերով պարզվել է, որ «ՊՐՈՄՏԵԽՆԻԿԱ» ՍՊ ընկերության անվամբ թիվ 05100011/131219/0038643 և թիվ 05100011/271219/0040565 ապրանքների հայտարարագրերով ՀՀ տարածք ներմուծված և «բեռնատար ավտոմեքենայի բենզինային շարժիչի ներքին այրման մաս» նկարագրությամբ հայտարարագրված ապրանքատեսակը հայտարարագրվել է ապրանքի նկարագրի վերաբերյալ ոչ ճշգրիտ տեղեկություններով «ՊՐՈՄՏԵԽՆԻԿԱ» ՍՊԸ-ի տնօրեն Սերգեյ Պյոտրի Պոլովինկի մեղքով, այսինքն՝ «բեռնատար ավտոմեքենայի բենզինային շարժիչի ներքին այրման մաս» ապրանքի նկարագրի փոխարեն այն ենթակա է հայտարարագրման «դիզելային շարժիչի համար նախատեսված մասեր» նկարագրությամբ, ինչի հետևանքով վերոնշյալ հայտարարագրերի մասով առաջացել են 85215 ՀՀ դրամի չափով պակաս հաշվարկված մաքսային վճարներ, այսինքն՝ Ս՝

Պոլովինկին թույլ է տվել ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ նախատեսված մաքսային կանոնների խախտում, ինչը հիմնավորվում է ՀՀ ՊԵԿ մաքսային հսկողության վարչության 28.02.2022թ. «Ապրանքի ոչ ճիշտ դասակարգում հայտնաբերելու դեպքում ապրանքի դասակարգման վերաբերյալ» որոշմամբ, 10.03.2022թ. կազմված թիվ 0002-Ա արտագնա մաքսային ստուգման ակտով և թիվ 05100011/131219/0038643 և թիվ 05100011/271219/0040565 ապրանքների հայտարարագրերով:


Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին 2-րդ պարբերությամբ, 206-րդ և 221-րդ հոդվածներով,

Ո Ր Ո Շ Ե Ց Ի՝

1. «ՊՐՈՄՏԵԽՆԻԿԱ» ՍՊԸ-ի տնօրեն Սերգեյ Պյոտրի Պոլովինկին (Հասցե՝ ք. Երևան, Մաշտոցի պողոտա, շենք 20) ճանաչել զանցառու՝ ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ թիվ 05100011/131219/0038643 և թիվ 05100011/271219/0040565 ապրանքների հայտարարագրերով և նրան տուգանել պակաս հաշվարկված մաքսային վճարների 50 տոկոսի չափով՝ 42608 ՀՀ դրամ: /վճարումը 900005024055 հաշվեհամարին, կող-19/

2. Որոշման մասին հայտնել Ս. Պոլովինկին՝ պարզաբանելով ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



Ա. ՄՆԱՑԱԿԱՆՅԱՆ